

**O‘ZBEKISTON RESPUBLIKASI  
VAZIRLAR MAHKAMASI HUZURIDAGI  
DAVLAT TEST MARKAZI**

**OLIV TA‘LIM MUASSASALARIGA  
KIRISH UCHUN BERILADIGAN  
IMTIYOZLAR**

**Ma‘lumotnoma**

*(2022-2023-o‘quv yili uchun)*

**Toshkent-2022**

Ma'lumotnomada oliy ta'lim muassasalarining bakalavriat ta'lim yo'nalishlariga kirish uchun beriladigan imtiyozlar va ularning qo'llanishi bo'yicha ma'lumotlar keltirilgan bo'lib, ma'lumotnoma oliy ta'lim muassasalarining bakalavriat ta'lim yo'nalishlariga kirish istagini bildirgan abituriyentlarga mo'ljallangan.

Abituriyentlarga oliy ta'lim muassasalarining bakalavriat ta'lim yo'nalishlariga kirish uchun imtiyozlar hukumatning tegishli qarorlari (*O'zbekiston Respublikasi Prezidentining farmon va qarorlari hamda Vazirlar Mahkamasining qarorlari*) asosida berilishi mumkin.

Davlat test markazi ijrochi tashkilot bo'lib, amaldagi qonunchilik hujjatlari asosida abituriyentlarga imtiyozlarni qo'llaydi. Qonunchilikda ko'rsatilmagan holatlarda esa hech kimga hech qanday qo'shimcha imtiyoz berish vakolatiga ega emas.

Keltirilgan ma'lumotlar 2022-2023-o'quv yili uchun o'rinli bo'lib, hukumatning tegishli qarorlariga o'zgartirishlar kiritilgan yoki o'z kuchini yo'qotgan taqdirda imtiyozlarning qo'llanishi o'zgarishi mumkin.

*Tuzuvchi:*

**J.T.Odilov** – Davlat test markazi bosh mutaxassisi.

*Taqrizchi:*

**G.R.Madrahimova** – Davlat test markazi yuridik byuro boshlig'i.

## MUNDARIJA

### III. Tegishli fan bo'yicha imtihondan ozod etilib, ma'lum miqdorda ball berishga asos bo'luvchi imtiyozlar

Respublika fan olimpiadalari g'oliblari.....	24
Chet tili sertifikatiga ega abituriyentlar.....	25
Musiqqa, raqs, teatr, folklor, tasviriy va amaliy san'at hamda dizayn yo'nalishlari bo'yicha respublika va xalqaro tanlovlar g'oliblari.....	26
“Bolalar sport o'yinlari”ning respublika bosqichi g'oliblari.....	27
Umumta'lim fanlaridan milliy sertifikatga ega abituriyentlar.....	28

### **III. TEGISHLI FAN BO‘YICHA IMTIHONDAN OZOD ETILIB, MA‘LUM MIQDORDA BALL BERISHGA ASOS BO‘LUVCHI IMTIYOZLAR**

#### **Respublika fan olimpiadalari g‘oliblari**

##### **Huquqiy asosi:**

1. O‘zbekiston Respublikasi Prezidentining “Iqtidorli yoshlarni aniqlash va yuqori malakali kadrlar tayyorlashning uzluksiz tizimini tashkil etish chora-tadbirlari to‘g‘risida” 2019-yil 3-maydagi **PQ-4306-son** qarori.

2. Vazirlar Mahkamasining 2021-yil 9-sentabrdagi **562-son** qarori bilan tasdiqlangan “Umumiy o‘rta ta‘lim tashkilotlari, akademik litsey va kasb-hunar maktablari o‘quvchilari o‘rtasida fan olimpiadalarini tashkil etish, o‘tkazish hamda xalqaro olimpiadalar ishtirokchilarini saralash va g‘oliblarni rag‘batlantirish tartibi to‘g‘risida” nizom.

**Qo‘llanishi:** Asosiy olimpiadalarning to‘rtinchi (*respublika*) bosqichida 1-, 2-, 3-o‘rinlarni egallagan o‘quvchilarga ixtisoslik fani bo‘yicha davlat oliy ta‘lim muassasalariga kirish imtihonlarida maksimal ball olish huquqini beruvchi va uch yil muddat davomida amal qiluvchi elektron sertifikatlar beriladi.

Informatika va axborot texnologiyalari fani bo‘yicha mazkur sertifikatni olgan o‘quvchilarga ixtisoslik fan sifatida matematika fanidan davlat oliy ta‘lim muassasalariga kirish imtihonlarida maksimal ball olish huquqi beriladi.

Tegishli fandan beriladigan maksimal ball fanlar majmuasida mazkur fan mavjud bo‘lgan abituriyent tanlagan barcha ta‘lim yo‘nalishlari uchun o‘rinli hisoblanadi.

**Mas‘ul vakolatli davlat organi:** Xalq ta‘limi vazirligi.

## Chet tili sertifikatiga ega abituriyentlar

**Huquqiy asosi:** Vazirlar Mahkamasining “Oliy ta’lim muassasalariga o‘qishga qabul qilishda milliy hamda xalqaro baholash tizimlari sertifikatlarini tatbiq qilish chora-tadbirlari to‘g‘risida” 2019-yil 13-maydagi **395-son** qarori.

**Qo‘llanishi:** Test sinovlari (kasbiy (ijodiy) imtihon) majmuasiga chet tili fani kiritilgan barcha bakalavriat ta’lim yo‘nalishlariga hujjat topshirgan va milliy yoki xalqaro imtihon tizimlari bo‘yicha tilni bilish darajalari B2 va undan yuqori bo‘lgan sertifikatga ega abituriyentlarga ushbu fandan imtihonlarsiz belgilangan maksimal ball beriladi.

Bunda Toshkent davlat yuridik universiteti uchun IELTS sertifikatiga ega abituriyentlarda **writing** moduli **5,5 ball** yoki undan yuqori bo‘lishi lozim.

Imtiyoz amal qiluvchi sertifikatlar:

- ingliz tili – milliy sertifikat, IELTS, TOEFL IBT 72, Cambridge Assessment English FCE, Cambridge Assessment English Linguaskill;
- yapon tili – milliy sertifikat, JLPT № 2;
- nemis tili – milliy sertifikat, Goethe-Zertifikat, DSD, Test DAF;
- fransuz tili – milliy sertifikat, DELF, TCF4;
- boshqa tillar – milliy sertifikat yoki xalqaro imtihon tizimlari.

Tegishli fandan beriladigan maksimal ball fanlar majmuasida mazkur fan mavjud bo‘lgan abituriyent tanlagan barcha ta’lim yo‘nalishlari uchun o‘rinli hisoblanadi.

**Mas’ul vakolatli davlat organi:** Davlat test markazi, Xorijiy tillarni o‘rganishni ommalashtirish agentligi.

*Izoh: Xalqaro sertifikatlar xalqaro tashkilotlar bilan hamkorlikda tekshiriladi.*

## **Musiqqa, raqs, teatr, folklor, tasviriy va amaliy san'at hamda dizayn yo'nalishlari bo'yicha respublika va xalqaro tanlovlar g'oliblari**

### **Huquqiy asosi:**

1. Vazirlar Mahkamasining 2008-yil 13-oktabrdagi **226-son** qarori bilan tasdiqlangan "Xalqaro va respublika olimpiadalari, tanlovlari, musobaqalari g'oliblari bo'lgan akademik litseylar, professional ta'lim muassasalari va umumta'lim maktablari o'quvchilarini taqdirlash tartibi to'g'risida" nizom.

2. Vazirlar Mahkamasining 2017-yil 20-iyundagi **393-son** qarori bilan tasdiqlangan "Oliy ta'lim muassasalarining bakalavriyatiga talabalarni o'qishga qabul qilish tartibi to'g'risida" nizom.

**Qo'llanishi:** Madaniyat vazirligining musiqqa, raqs, teatr, folklor, shuningdek Badiiy akademiyaning tasviriy va amaliy san'at hamda dizayn yo'nalishlari bo'yicha respublika tanlovi (1-o'rin) hamda mazkur yo'nalishlardagi xalqaro tanlovlarning (1-3-o'rinlar) g'oliblariga tegishli oliy ta'lim muassasalarining kasbiy (ijodiy) imtihonlarida soha bo'yicha eng yuqori ball belgilangan fandan maksimal ball olish imtiyozi beriladi.

Agar kasbiy (ijodiy) imtihonlarda eng yuqori ball bir nechta fanlardan belgilangan bo'lsa, abituriyentga imtiyozli maksimal ball olish uchun fanlardan birini tanlash huquqi beriladi.

Tegishli fandan beriladigan maksimal ball fanlar majmuasida mazkur fan mavjud bo'lgan abituriyent tanlagan barcha ta'lim yo'nalishlari uchun o'rinli hisoblanadi.

**Mas'ul vakolatli davlat organi:** Madaniyat vazirligi, O'zbekiston badiiy akademiyasi.

## **“Bolalar sport o‘yinlari”ning respublika bosqichi g‘oliblari**

**Huquqiy asosi:** O‘zbekiston Respublikasi Prezidentining “O‘zbekiston Respublikasida jismoniy tarbiya va sportni yanada takomillashtirish va ommalashtirish chora-tadbirlari to‘g‘risida” 2020-yil 24-yanvardagi **PF-5924-son** Farmoni.

**Qo‘llanishi:** “Bolalar sport o‘yinlari”ning jamoaviy o‘yin turlari bo‘yicha respublika bosqichi g‘oliblariga (1-o‘rin) oliy ta‘lim muassasalariga kirish imtihonlarida soha bo‘yicha mutaxassislik fanidan maksimal ball olish huquqini beruvchi, uch yil muddat davomida amal qiluvchi sertifikat beriladi.

Tegishli fandan beriladigan maksimal ball fanlar majmuasida mazkur fan mavjud bo‘lgan abituriyent tanlagan barcha ta‘lim yo‘nalishlari uchun o‘rinli hisoblanadi.

**Mas‘ul vakolatli davlat organi:** Sportni rivojlantirish vazirligi.

## **Umumta'lim fanlaridan milliy sertifikatga ega abituriyentlar**

**Huquqiy asosi:** Vazirlar Mahkamasining “Umumta'lim fanlarini bilish darajasini baholashning milliy test tizimini joriy etish to'g'risida” 2020-yil 12-oktabrdagi **646-son** qarori.

**Qo'llanishi:** Umumta'lim fanlarini bilish darajasini baholash test sinovlari natijasi bo'yicha eng yuqori ballning kamida 60 foizini to'plagan shaxslarga 3 yil muddat davomida amal qiluvchi davlat namunasidagi sertifikat beriladi.

Umumta'lim fanini (*chet tili bundan mustasno*) bilish darajasi to'g'risida davlat namunasidagi sertifikatga ega bo'lgan abituriyentlarga sertifikatdagi o'zlashtirish foiziga mos ravishda oliy ta'lim muassasasi bakalavriatiga o'qishga qabul qilish bo'yicha test sinovlarida ushbu fandan belgilangan maksimal ballga nisbatan tabaqalashtirilgan (*proporsional*) ball beriladi.

Tegishli fandan beriladigan tabaqalashtirilgan ball fanlar majmuasida mazkur fan mavjud bo'lgan abituriyent tanlagan barcha ta'lim yo'nalishlari uchun o'rinli hisoblanadi.

Hozirga qadar umumta'lim fanlaridan sertifikatlash tizimi ona tili va adabiyot (*o'zbek tili va adabiyoti, rus tili va adabiyoti, qoraqalpoq tili va adabiyoti*), matematika, kimyo va biologiya fanlari bo'yicha joriy etilgan bo'lib, 2022-2024-yillarda fizika, geografiya va tarix fanlaridan joriy etish belgilangan.

**Mas'ul vakolatli davlat organi:** Davlat test markazi.